

di Ester Sardoz Barlessi

GENTE ISTRIANA

Mi go i oci velai
e un gropo dentro
ogni volta che penso
a la mia gente
de sempre sparaiada per el mondo
per un giogo del destin,



la mia gente innocente,
col cuor de fioi, le mani sempre in moto,
che per storie de politica
de amor o de miseria
ga dovuto far fagoto.
Mi go un dolor de dentro,
che nol passa,
co se se incontra
cussì, per caso,



in spiaggia o visin la Serpentina

e se se domanda in tono disperado

coss' che xe de la Giovanina,

de Carlo o de Gigi

e po ti senti che la Giovana

riposa in un altro cimitero,

la ga strussià tuta la vita,

e la voleva propio vegnir,

'desso che la podeva, povera fia,

ma po' la ga stroncada

una brutta malatia,

e Carlo, in Australia

el xe andà a finir

e Gigi, chissà perché,



no el ga mai volù vegnir.

Dio, che tristessa

in te la contentessa

de quel rivederse solo per le ferie,

e quante storie dolorose drio,

de poveri cristi tormentadi!

Per orgolio, per la lingua o per ideal

chi se ga trovà de qua

e chi de là de la baricada,

ma tuti ga ale spale

una famiglia sbregada.

E che pianti!

La mama voleva andar via

ma voleva restar el mari

de la fia,

un fradel se sentiva talian,

un altro druso

e i se tegniva el muso,



Tizio gaveva l' amante che partiva,

cussì via anche lui,

perché se no el moriva.

E 'sti pici grandi drammi

ga portà dolor e afani

che ancora se strassina in te i ani

e co se trovemo tuti insieme

se magnemo coi oci,

perché savemo,

che sia noi che semo restai

che quei che ga fato le valise,

se portemo dentro le stesse radise.

Se l'articolo ti è piaciuto condividilo su:

- [Facebook](#)
- [Twitter](#)
- [Pinterest](#)
- [LinkedIn](#)
- [E-mail](#)
- [Stampa](#)
- [WhatsApp](#)
- [Telegram](#)